

Fin na Decreto Real (KB)

Gobernador a firma presupuesto 2014

ORANJESTAD – Ayera Gobernador di Aruba a firma presupuesto 2014 y e ley pa e presupuesto supletorio y di e forma aki a trece un fin na Decreto Real di dia 11 di juli ultimo.

Manera ta conoci, dia 11 di juli 2014 Consejo di Minister di Reino a dicidi pa entrega un indicacion na Gobernador di Aruba pa wanta firmamento di presupuesto di Aruba 2014. Un investigacion riba calculacionnan den e presupuesto aki mester a wordo haci. Aki a inicia un proceso cu mester a encamina y despues di a cana esaki, por bisa awe cu a yega na un fin di e Decreto Real di 11 di juli' y a cumpli cu e Koninklijk Besluit (KB).

Les a detayenan riba pagina A3

Fin na Decreto Real (KB)

Gobernador a firma presupuesto 2014

ORANJESTAD - Gobernador di Aruba a firma e presupuesto 2014 y e ley pa e presupuesto supletorio 2014 ayera. E tambe ta informa cu esaki ‘ta yega un fin na e Decreto Real di 11 juli’, pues a cumpli cu e Koninklijk Besluit (KB).

Minister Angel Bermudez di Financia a reacciona ayera nochi riba e echo aki. Den un relato e ta expresa cu e ta ‘contento cu a logra finalisa e proceso completo di e presupuesto 2014 y e supletorio e aña aki ainda’.

Tambe e ta ‘sigura cu pronto lo continua cu e detayenan riba e presupuesto 2015 pa asina entrega esaki na tempo manera ley ta stipula y finalisa esaki den inicio di 2015 y no na final di aña atrobe’. Mester remarca si cu e presupuesto 2015 ta laat caba pasobra segun ley e mester wordo entrega no mas laat cu september di e aña aki.

E declaracion di gobernador a wordo manda ayera atardi pa prensa. E comunicado ta contene un resume di e sucesonan desde e momento cu parlamento a aproba e presupuesto 2014 riba 25 di juni. “Dia 11 di juli 2014 Consejo di Minister di Reino a dicidi pa entrega un indicacion na Gobernador di Aruba pa wanta firmamento di presupuesto di Aruba 2014, y pa laga haci un investigacion riba realidad di e calculacionnan den e presupuesto aki y e desaroyo di mas aña di finanza publico di Aruba.”

Manera ta conoci, College Financieel Toezicht CFT a haci e investigacion aki y a manda un rapport (final) riba 12 di september pa gobernador. Basa riba e resultadonan y den liña cu articulo 2, inciso dos, di e Decreto Real, gobernador a ‘invita’ e minister di Financia di Aruba pa ‘prepara un Landsverordening pa

modificacion di e concepto di e presupuesto di pais Aruba 2014’. Y gobierno mester tene cuenta cu e resultadonan di e investigacion pa cu e ley nobo aki. Esaki a resulta den e presupuesto supletorio cu a wordo aproba siman pasa pa parlamento.

A bolbe presenta na CFT
Locual e gobernador tambe ta informa, ta cu a presenta e presupuesto supletorio atrobe pa conseho na CFT. Y cu e organo aki a entrega su conseho ayera.

“Relaciona cu e conseho aki gobernador a dicidi cu no tin suficiente motibo pa no keda sin stipula e dos Landsverordening nan den concepto cu parlamento a aproba, y a firma prome e landsverordening pa stipulacion di presupuesto di Aruba 2014 y despues el a firma e Landsverordening pa modificacion di e presupuesto di Aruba 2014.”

“Cu firmamento di tur dos Landsverordening a cumpli cu e indicacion cu gobernador a haya for di Consejo di Minister di Reino. Cu esaki a yega un fin tambe na e Decreto Real”, asina e declaracion tambe ta bisa.

Mas gasto

Ayera a sali den Bon Dia Aruba caba e CFT tabata envolvi tambe den e proceso di presupuesto supletorio. Pero segun e secretario di CFT, Kees van Nieuwamerongen, e organo solamente a duna consehonan di un distancia. Entre otro a conseha gobiernu pa tuma pasonan prome cu ta duna resultadonan lihe, manera hisa BBO, prome cu cuminsa corta gastonan y otro proyectonan cu ta tuma mas tempo.

E secretario tambe a expresa cu CFT ta haya ‘curioso’ cu gobiernu a dicidi di gasta placa di biaha na pago di ‘eindejaar-

suitkering’. E presupuesto supletorio a wordo cambia na ultimo despues gobiernu a dicidi di paga gelijkbedrag pa ambtenaar pensiona. Esaki ta nifica cu mester gasta 12 milyon florin mas.

No ta cla

Un otro cos cu no ta mucha cla, ta cu segun gobiernu di Aruba CFT ta keda envolvi den e proceso di presupuesto 2015 unda tambe ta indica kico mester haci pa yega un presupuesto balansa na 2018. Y gobiernu a indica cu esaki mester wordo entrega prome cu diahuebs awor.

Tambe gobiernu a informa cu CFT ta keda envolvi den e Consejo Fiscal (Fiscal Council) nobo cu ta wordo lanta otra aña. Pero e secretario Van Nieuwamerongen a bisa cu nan no sa di niun acuerdo ainda pa controla e presupuesto 2015 ni di un participacion den e Consejo Fiscal. □